

Jamaican - Siev Gad Wod - Salvation Scriptures

Ifiijan 2:2 Dem taim de unu yuus tu du di wikid sitn dem we di worliyan dem du. Unu yuus tu fala di wan we ruul an av powa iina di skai, di spirit we a wok iina di piipl dem we ton we fram wa Gad waahn dem fi du.

Matyu 6:10 Mek di taim kom wen yu ruul iina evri wie. Mek we yu waahn apm pan ort apm, jos laik ou a wa yu waahn fi apm iina evn apm

Luuk 22:42 “Faada, ef yu waahn fi dwi'it, tek da kop ya fram mi, bot ef a no dat yu waahn, aarait den.”

Jan 16:7-9 Bot mi a tel unu fi chuu chuu se dat a fi fu'unu uona gud dat mi a go we. Kaa ef mi no go we, di Elpa naa go kom tu unu. Bot ef mi go we mi a-go sen im kom tu unu. 8 Wen im kom, im gweehn mek di piipl dem iina di worl nuo se dem rang bout sin, dat dem rang bout ou sumadi kyan get rait iina Gad yai an rang bout ou Gad joj piipl. 9 Dem rang bout sin, kaa dem no chos iina mi.

2 Timoti 2:10 An sins di mesij no iina prizn mi wi gwaan sofa fi di piipl dem we Gad pik. So dat Jiizas Krais wi siev dem an so dem kyan liv fi eva wid Gad.

Ruoman 15:20,21 Wa mi did aalwiez waahn fi du a fi go priich di Gud Nyuuz bout Krais Jiizas wich paat nobadi neva go priich yet. Da wie de mi wudn a bil pan di wok we sumadi els di staat fi du, 21 bot insted-a dat, siem laik ou it rait dong iina Gad wod: “Di piipl we nobadi neva tel bout Jiizas, dem wi si an di wan dem we neva ier bout im, dem wi andastan.”

Aks 2:36,37 “So mi waahn aal a unu Izrel piipl fi nuo an andastan dis: Gad mek da siem Jiizas ya Laad an Krais.” 37 Wen di piipl dem ier di sitn dem we Piita se, a laik sitn tab dem iina dem aat. So dem aks Piita an di ada apasl dem se, “Wi breda, wa wi fi du?”

Ibruu 4:2 Kaaz wi did ier di Gud Nyuuz priich jos laik ou di Izrel piipl dem did ier it tu. Bot di wod we priich neehn elp dem at aal at aal kaaz dem neehn biliiv laik di res a piipl dem we did ier it.

Jerimaiya 24:7 - Matyu 22:37 Jiizas ansa bak, “Lov di Laad we a fi yu Gad. Yu fi lov im wid aal a yu aat, aal a yu suol, an wid aal a yu main.’

Aks 16:14 Yu did av wan uman mongks dem fram Taiyataira niem Lidiya we yuus tu sel som dier porpl klaat. Shi did lov Gad so moch dat shi

**aalwiez a du di sitn dem we shi nuo Gad waahn ar fi du. Di Laad toch ar
aat mek shi andastan an biliiv wa Paal did a se.**

**Matyu 13:14-16 So wa Gad did mek Aizaiya se, dem piipl ya mek it kom
chuu. Aizaiya did se: “Unu wi lisen gud gud, bot unu wi neva andastan,
Unu wi luk aad aad, bot stil unu naa go si'it. 15 Kaaz dem piipl ya aat
get tof, an dem kyaahn lorn notn. Dem aad-iez, an dem yai lak op tu. So
dem kyaahn si notn wid dem yai an dem kyaahn ier notn wid dem iez,
an dem aat naa andastan notn niida, ar dem wuda ton tu mi, an mi
wuda siev dem.’ 16 Bot Gad bles fu'unu yai an iez dem, kaa dem si an
ier!**

**Aizaiya 6:9,10 - Aks 28:27 Kaaz dem piipl ya blak dem main, brok tik iina
dem iez, an lak dem yai dem, so dem kyaahn si wid dem yai dem, ar ier
wid dem iez dem an andastan wid dem main, an ton we fram wa rang,
an mi wuda iil dem.’**

**Maak 4:11,12 So im ansa dem se, “Unu get di chaans fi nuo di siikrit sitn
dem bout Gad kindom. Bot di piipl dem we de outsaid, mi yuuz tuori tel
dem evriting, 12 so “livn duo dem mait-a a luk an a luk aad aad, dem
naa go si notn, an ivn duo dem mait-a a lisen an a lisen gud gud dem naa
go andastan wa dem ier, kaaz ef dem did andastan dem wuda ton we
fram dem sin an get siev.”**

**Jan 12:39,40 An dem kudn chos iina im kaaz jos laik wa Aizaiya se a wan
neks plies, 40 “Gad blain dem an im mek dem aat tof, so dem kyan
niida si wid dem yai, ar andastan iina dem main, ar ton tu mi, Gad, an
chienj dem wiez so mi go mek dem get beta.”**

**Ruoman 11:7,8 So den, wa wi kyan jraa fram aal a dat? Di sitn dem we di
Izrel piipl did a luk fa aad aad, dem neva fain it, bot di piipl we Gad pik,
dem did fain it. Di res a dem, Gad mek dem ton dem aat gens im. 8 A
siem so it rait iina Gad wod se, “Gad mek it so dat dem kyaahn fiil ar
andastan notn; dem av yai we kyaahn si an iez we kyaahn ier, an tu da
die ya, a so dem tan.”**

**2 Tesaluoniyen 2:10,11 Im a-go du aal kain-a wikidnis fi chrik op di piipl
dem we boun fi ded, kaaz dem did ton dem bak, an neehn lov di chuut
we wuda siev dem. 11 So siek-a dat, Gad a sen wan powaful sitn we wi
twis op ou dem tingk, so dem kyan biliiv di lai dem.**

**Matyu 13:18-23 “So lisen tu wa di tuori bout di faama a se: 19 Wen nobadi
ier di mesij bout Gad kindom an no andastan it, di wikid wan kom siem
taim kom tek we wa get plaant iina dem aat. Dis a di siid we did jrap
wich paat piipl waak. 20 Di siid we jrap wich paat bier rakstuon de, a di**

sumadi we ier di wod an glad fi it siem taim. 21 Bot siem laik di plaant uufa ruut no go dong diip iina di grong, im no mek Gad wod go diip iina im aat, so im no laas no taim. Bot wen tof taim lik im siek-a Gad wod, im gi op an ton bak siem taim — siem laik ou di plaant jrai op an ded. 22 Di wan we jrap iina makabush, a uu ier Gad wod bot im staat fret bout laif, an aal im kyan tingk bout a ou fi mek moni an get rich. Dem sitn de blak Gad wod, so it no du notn difrant iina dem laif. 23 Bot di siid we jrap pan gud grong nou, da sumadi de ier Gad wod an andastan it. So, laik di siid we plaant pan gud grong im bier wan onjrid, siksti ar toti taim muo fruut dan wa di faama did plaant op.”

2 Korintiyan 3:15,16 Yes, aal nou wen Muoziz Laa riid out loud, a laik di klaat stil a kova dem, an dem main blak aaf. 16 Bot wen yu biliiv iina di Laad, im tek we da piis a klaat de.

Ozeya 11:3-7 - Matyu 11:28-30 “Aal a unu we taiyad an bordn dong unu kom tu mi an mi wi mek unu get fi res. 29 Jos laka ou di kou tek di wudn yuok pan dem shuolda, a so unu fi tek op di sitn dem we mi tel unu fi du, an tek iin wa mi a tiich, kaa mi wi tek taim wid unu, an mi riili ombl, an unu wi get fi res unu suol. 30 Kaaz di sitn dem we mi a tel unu fi du, dem iizi an di luod we mi de gi unu — lait.”

Aks 26:18 Mi a sen yu tu dem so yu kyan elp dem fi si an kom outa di daaknis an kom iina di lait. An mi a sen yu fi elp dem get frii fram Sietan powa an mek Gad ruul dem laif. Da wie de dem wi ton paat a Gad piipl uufa sin im paadn kaaz dem biliiv iina im.’

2 Timoti 2:24-26 An Jiizas Krais sorvant dem no fi fait; dem fi kain tu evribadi. Dem fi kyan tiich gud an wen dem a diil wid piipl dem fi tek dem taim wid dem. 25 Gad sorvant, wen im a karek di wan dem we go gens di chuut, fi tek im taim wid dem. Kaaz Gad mait-a mek dem chienj dem wiez an lorn di chuut. 26 An dem mait-a get sens an si se di devl chrap dem an kyan get outa it. Di devl did chrap dem so im kuda yuuz dem fi du im wok.

Revilieshan 3:17-19 Unu se, ‘Mi rich; mi av uol iip a moni an evriting mi waahn.’ Bot yu no si ou yu mash op an tan bad, an pap dong laik ou shuuz bak, an puor, an blain an na'av aan no kluoz? 18 Dis a wa mi tingk unu shuda du, bai guol fram mi, guol we bon iina faiya fi get out aal wa no fi iina it. Ef unu bai da guol de, unu wuda riili get rich. Bai wait kluoz fram mi so unu kyan kova op unuself. Da wie de unu na'afi shiem kaaz unu na'av aan no kluoz. An bai yai jrap fram mi tu fi jrap iina unu yai dem so unu kyan si. 19 Di piipl we mi lov, mi taak tu dem

aad an chrietn dem out an mek dem nuo se we dem a du rang. So get siiros an ton we fram unu sin dem an shuo se unu sari.

2 Korintiyan 7:10 Kaaz ef sumadi a sin, an dem sari fi wa dem du laik ou Gad waahn dem fi sari, dem wi ton we fram dem sin an beg Gad fi paadn dem. An wen dem du dat Gad wi siev dem. Nobadi naa go se dem sari se dat apm. Bot ef sumadi a sin an no sari ou Gad waahn dem fi sari, dem a-go gwaan sin an dem naa go get siev. Dem a-go ded.

1 Kings 18:37 - Gad turn heart back to Gad

2 Korintiyan 4:4 Dem no biliiv kaaz di devl we ruul da worl ya, blain dem so dat dem kyaahn si di lait. Im blain dem so dat dem kyaahn andastan di Gud Nyuuz bout Krais Jiizas. Im mek it so dat dem kyaahn andastan se Jiizas a jos laik Gad.

Luuk 8:11-15 “Di tuori wa mi jos tel unu, dis a wa it miin: Gad wod a di siid. 12 Di wan dem we jrap wich paat piipl waak, a piipl we ier di wod, an den di devl kom tek di wod outa dem aat, so dem wi no biliiv an get siev. 13 Di siid dem we jrap pan di grong we bier rakstuon de, a piipl we glad fi Gad wod, biliiv Gad wod fi likl bit, bot siem laik di plaant dem uuфа ruut no go dong diip iina di grong, dem no mek Gad wod go diip iina dem aat. Dem biliiv fi likl bit, bot wen taim kom fi dem get tes, dem ton bak — siem laik ou di plaant jrai op an ded. 14 Di wan dem we jrap iina makabush, a di piipl we ier Gad wod, bot dem staat fret bout laif an aal dem kyan tingk bout a ou fi mek moni an ou fi enjai demself. Dem mek dem sitn de chuok dem so dem no bier no raip fruut. 15 Di wan dem we jrap pan gud grong, a di piipl dem uuфа aat riili gud. Dem ier di wod an uol aan pan it. Aal wen aad taim kom, dem stil bier fruut.”

Aks 15:11 Nuo man! Wi biliiv a chuu wi Laad Jiizas lov wi iivn duo wi no dizorv it wai im siev wi jos laik ou im siev dem.

Ruoman 8:13 (Ef yu liv ou yu badi wuda waahn yu fi liv, yu mos ded.) Bot ef yu mek di Spirit elp yu, yu kyan tap du di sitn dem we yu badi waahn yu fi du, an den yu wi liv.